

To'on yó'o kían mií noó ni taa San Pedro ni sa'an noó na kúú kuendá Jesús

Ká'an Pedro ndisá'an

1 ¹ Yu'u kúú Pedro, ta kúú iin apóstol, na né'e to'on Jesucristo. Ta ká'an yu'u ndisá'an xí'in ndo'ó, na ni xitá noo kua'an ndéi chí kuendá Ponto, xí'in Galacia, xí'in Capadocia, xí'in Asia, xí'in Bitinia.

² Ndo'ó kúú na ni kaxi mií tatá Ndios táto'on k'i'o ni chikaa ini na kee na xí'in ndó nda míi sa'a, dá ná kakuu ndó ñayuu na kee Espíritu i'i ná, dá kueídó'o ndó na, ta ná nduvii ndo kee ni Jesucristo.

Ta ná koo kuá'a ña maní Ndios xí'in ndó, ta ná k'i'o na ña koo va'a ini ndo.

Kómí ndisa yó iin tandeé iní

³ Na ká'ano kúú Ndios, na kúú tatá sato'o yo Jesucristo, dá chí sa'a ña ni ku'u ká'ano ini na sa'a yo, sa'a ñoó ni nakaki sa'a yo ni kee na, dá ni kuu ni natiin yó iin tandeé iní ká'ano nda'o noo ná, chí miían ndaa kuiti ni nataki sato'o yo Jesucristo tein na ni xi'i. ⁴ Sa'a ñoó natiin ta'ani ndó iin ña ká'ano nda'o chí induú di'a, chí sa ió nduu vaan natiin ndo'ó. Ta kían ña ni iin kuu ta'ón o té'i, ta kían ña ni iin kuu ta'ón o túú, ta kían ña ni iin kuu ta'ón o ndí'i. ⁵ Ta táxi va'a Ndios ndo'ó xí'in ndée míi ná sa'a ña kándéé ká'ano iní ndo ná, dá kasandaá ndo ni'i ndo ña kaki ndó, dá kandeí ndó xí'in ná, chí sa ió nduu va ña'a yó'o natiin ndó tá ná kasandaá kuu noo ndí'i.

⁶ Sa'a ñoó kadii iní ndo, va'ará tein cháá kuu kánian ndo'o nio ndo kee kuá'a noo tandó'ó. ⁷ Chí tandó'ó ñoó kían korndodó ña kándéé iní ndo Jesús, nde'a á ndíta ndaa ndo xí'an. Ta ndáya'i cháá ka ña kían kándéé iní ndo ná o duú oro, tá'an ña xito ndodó ñayuu xí'in ñó'o, dá nde'a á miían ndaa kuiti oro ndino'o kían o koó. Tído kasandaá iin kuu, ta naá vá oro ñoó. Tído ndo'ó, tá miían ndaa kuiti ndíta ndaa ndo xí'in ña kándéé iní ndo ná tein tandó'ó, dá kían chindaya'i ñaá Ndios, ta k'i'o na ñaño'ó, xí'in ña ndato noo ndo tá ná na'a noo tuku Jesucristo. ⁸ Kóni ndo ná, va'ará ko ní xiní ndo ná xí'in noo ndo. Ta va'ará ko ndé'é ndó na viti, tído kándísa ndó na. Ta ndato nda'o kadii iní ndo, ta ni ko ní'i ndo to'on ka'an ndo sa'a ndi k'i'o kadii ini ndo, ⁹ chí ní'i ndo ña va'a sa'a ña kándéé iní ndo ná, ta ñoó kían kaki ndó noó kuachi ndo.

¹⁰ Ni ka'an profeta ni sa ndei sa na'a sa'a ña maní ko'on Ndios kee na xí'in ndó. Ni dakuá'a va'a ra sa'an, ta ni kee ra tata kandaá ini ra ndi koo kee Ndios dáka'ki na ñayuu. ¹¹ Chí ni dakuá'a ra sa'a ndá yoo kakuu na kee dión, ta ndá oon koo na, chí ió Espíritu Cristo ini ra, ta ni kast'o'on na xí'in rá sa'an. Chí ni xi'o na ña ni kandaá ini ra ña ndo'o

nda'o nío Cristo, na kii dákaki ñaá, ndi'i daá, dá nani'i ná ñañó'ó noo Ndios. ¹² Kúú nī xī'o Ndios ña kīan nī kandaá ini ra ña o duú mií rá keva'a xí'ín ña dána'a ra, sava'a yóo vá kúú na keva'a xí'án. Ta mií to'on nī daná'a ra tá sata, mií to'on yó'o iī vá kīan dána'a na noo ndo viti sa'á to'on va'a ña ká'an sa'a Jesús, ta dána'a na ña xí'ín ndée Espíritu iī Ndios, na nī kii nda induú. Ta nda mií ángel ndéi induú kátoó kandaá ini sa'á ña yó'o.

Kóni Ndios ña koo vii yo noo ná

¹³ Sa'á ñoó kenduu ndo ñaxintóni ndo kee ndó ña kóni Ndios, ta kaño'o ini ndo, ta ndino'o ini ndo koo tandeé iní ndo ña natiin ndó ña manī noo Ndios tá ná nandió koo tuku Jesucristo kasaa na. ¹⁴ Ta koo ini ndo kee ndó táto'on kī'o kée iin de'e seídó'o tatá, ta o sa kée ka ndo ña kini, ña sa kátoó ndo kee ndó tá ko ñá'a kana'á ndó Ndios. ¹⁵ Chi táto'on na vii kúú mií Ndios, na nī kana ndo'ó xoo mií ná, kī'o dión koo vii ndo noo ndidaá ña kée ndó. ¹⁶ Dá chi di'a kaá tuti iī Ndios: “Koo vii ndo, chi na vii kúú yu'u.”

¹⁷ Tá ká'an ndo tatá xí'ín Ndios, na kényiko ndaa sa'á ña kée iin rá iin yó, dá kīan koo ñañó'ó ndó noo ná, ta kayu'ú ni'ini ndó na xīan nani ndéi ndó ñoo tukú xaan. ¹⁸ Ta ná'a vá mií ndó ndí kīan nī sa kuu ya'i, ña nī dakáki ndo'ó tixi ndá'a ña ko chón sa kee na yatá ve'e ndó. Chi ko ní sá kian iin ña'a túú, táto'on ndó'o oro xí'ín plata. ¹⁹ Di'a niī ndato mií Cristo, tá'an kirá nī xitá sa'á kuachi ndo, nī sa kuu ya'i nī dakáki ñaá. Chi nī sa kuu na táto'on kī'o iin léko, kirí dóko ñayuu noo Ndios, kirí káa vii, kirí ko yáko. ²⁰ Chi nda rá ko ñá'a kasá'a ñayuú yó'o, nda daá vá nī chikaá ini Ndios ña koo dión. Ta ña yó'o nī kuu tein tiempo viti, chi kú'u nda'o ini na sa'a yo. ²¹ Ta sa'á ña nī kee Jesús dión, sa'á ñoó nī kasandaá ndo kándisa ndó Ndios, na nī danátaki ñaá tein na nī xi'i. Ta nī xī'o Ndios ñañó'ó noo ná. Dión nī kee na, dá kīan ná kandeé iní ndo Ndios, ta ná koo tandeé iní ndo noo iin tó'on dinī mií vá ná.

²² Chi nī nduvii nío ndo sa'á ña seídó'o ndó ña ndaa sa'a Ndios nī kee Espíritu iī Ndios, dá kandeé ndó ku'u ini ndo sa'a sátá'an ndó xí'ín ndino'o ini ndo. Sa'á ñoó ndino'o ini ndo ku'u ini ndo sa'a sátá'an ndó xí'ín iin nío vii. ²³ Dá chi ndo'ó kúú na nī nakaki saá, ta ko ní káki ndó táto'on káki ñayuu, na ndéi tóo, dá xí'i na. Dá chi ndo'ó kúú na nī nakaki saá, dá kandeí chíchí ndó kee to'on mií Ndios, chi to'on takí kían, ta daá kuití vá kooan. ²⁴ Dá chi di'a kaá tuti iī Ndios:

Ndidaá kúú ñayuu ndó'o táto'on kī'o ndó'o yukú káa yúku,
ta ña kúryíí ná kúú táto'on ita yukú ñoó.

Chi íchi va yukú ñoó, ta kúú kuéi va itaan.

²⁵ Tído to'on sato'o yo Ndios, daá koo kuií vaan.

Ta to'on yó'o kúú to'on va'a sa'a Jesús, ña kīan nī daná'a ndu noo ndo.

2 ¹ Sa'á ñoó dánkoo ndi'i ndó ña kini xí'ín ña mañá kée ndó, ta kō kánian kakuu ndó ñayuu uū noo, ta ni kō kánian koo u'ū ini ndo, ta kánian dánkoo ta'ani ndó ndidaá ña kini ká'an ndo sa'á ñayuu.

² Tató'on kée takuálí nándukú xí noo chichí xí, kī'o dión nandukú ndó to'on Ndios, ña kúú ña ndaa, dá kua'ano ndó xí'án nani kasandaá kuu kākī ndó. ³ Ta kī'o dión kee ndó sa'á ña xí'o ndaa ndo kuendá ña va'a nda'o ini sato'o yo Jesús.

Mií vá Jesús kúú yuu ndáya'i cháá ka

⁴ Sa'á ñoó kuyati cháá ka ndo noo Jesús, ña kúú táto'on iin yuu takí, tá'an ña ni kañó'ó taa ñayuú yó'o. Tído mií Ndios kúú ña ni kaxi ñaá, ta kúú ná yuu ndato cháá ka. ⁵ Ta mií ndó kúú ta'ani táto'on yuu takí. Sa'á ñoó konó ndó ná kava'a Ndios ve'e ño'o ña xí'ín ndó, dá kakuu ta'ani ndó duti iī noo mií ná, dá kuu dokō ndo ña náta'an ini Ndios xiní ña, ta kúú natiin va'a ña dóko ndo sa'á ña ni kee Jesucristo. ⁶ Chī ká'an ta'ani tuti iī Ndios di'a:

Ko'ín chindu'í iin yuu ió tito ndáya'i cháá ka chí ñoo Sion, dá chī yuu yó'o kían ni kaxi mií, ta kían iin yuu ndato.

Sa'á ñoó ndi ndaa mií vá ñayuu ná kandísa ñaá, dá kían ni iin kuu ta'ón o káka'an noo ná.

⁷ Ta noo ndo'ó, ña kándísa, yuu yó'o kúú yuu ndato cháá ka. Tído ndidaá ña kō kándísa ñaá, ndo'o na táto'on kī'o ká'an tuti iī Ndios:

Tá'an yuu ni kañó'ó taa kava'a ve'e, ña yó'o di'a va ni kasandaá kakuu yuu tito.

⁸ Ta ká'an ta'anian di'a:

Mií yuu yó'o kedaá xí'ín ná, dá kachi'i sá'a ná, chī kían iin yuu kedaá xí'ín ná kuei na.

Ni kachi'i sá'a ná chī kō xí'ín ña kueídó'o na to'on va'a, chī sa kī'o dión ni ni'í tá'í ná ndo'o na.

Kúú yó ña ñoo Ndios

⁹ Tído ndo'ó kúú ña ni kaxi mií Ndios kakuu ñayuu ña, ta kúú ndó duti noo mií Ndios, ña kúú rey, ta kúú ndó iin ñoo iī, ta kúú ndó ñayuu ni taó xóo mií Ndios, dá kasto'on ndó sa'á ña ndato kée na, chī noón kúú ña ni ñaditá ndo'ó íchī noo íin naá, ta ni ñachi'i na ndo'ó íchī noo ndato tóon. ¹⁰ Chī tá sata kō ní sá kuu ndó iin ñoo, tído viti ni kasandaá ndo kúú ndó ñoo mií Ndios. Tá sata kō ní kándeé ndó ña ku'ū ini Ndios sa'a ndo, tído viti kían ni ni'í ndo ña kú'ū ini ña sa'a ndo.

Kánian na'a yo mií yó ña kúú yó kuendá Ndios

¹¹ Ña mani, seí nda'ávíi noo ndo'ó, ña ndéi tóo ñoo tukú xaan, ña o sa náki'o ndó míi ndó noó ña kini kóni ñíi ndo, ña naá tá'an xí'ín ña va'a kóni níno ndo kean. ¹² Di'a koo ini ndo kendúsá'ano ndó noó ñayuu kō

ná'á Ndios, dá kían va'ará chínaní kini na ndo'ó viti, tído ná keká'ano na Ndios sa'á ña va'a kée ndó tá ná kasandaá kuꝯ dátoꝯ Ndios ñaxintóni ná.

¹³ Ta sa'á ña ió ñañó'ó yó noꝯ sato'o yo Jesús, sa'á ñoꝯ koo ini ndo kueídó'o ndó ndidaá ta né'e choon ñayuu yó'o, á mií rá kúú rá rey, ra né'e choon ká'ano cháá ka, ¹⁴ o á mií rá kúú rá ta né'e choon ñó'o tixi ndá'a rey ñoꝯ, tá'an ra ni ni'i choon ña kadi ra ñayuu káni ve'e ka, ta né'e ta'ani ra choon ña náki'o ra ñañó'ó noꝯ na kée ña va'a. ¹⁵ Dá chi ña kóni Ndios kían kee ndó ña va'a, dá ná o ní'i ñayuu xixi koꝯ ñaxintóni ña ka'an ndava'a na sa'a ndo. ¹⁶ Ko ñó'o ndó tixi ndá'a ni iin ley, tído ná dá'a ni ka'an ndó ña nónó noꝯ ndo kee ndó ña kini. Di'a nónó noꝯ ndo kee ndó ña kóni Ndios. ¹⁷ Koo ñañó'ó ndó noꝯ ndidaá ñayuu, ta ku'u ini ndo sa'á na kúú kuendá Jesús, ta kayu'ú ni'ini ndó Ndios, ta koo ñañó'ó ndó noꝯ ta né'e choon.

Naki'o ndeé iní yo táto'on ki'o ni xi'o ndeé iní Jesús tein tandó'ó

¹⁸ Ta ndo'ó, na ñó'o tixi ndá'a iin sato'o, kueídó'o ndó ra kúú sato'o ndo xí'in ñañó'ó. Ta ná dá'a ni kee ndó dión sava'a xí'in ra kée ña va'a xí'in ndó. Ki'o dión ta'ani kánian kee ndó xí'in ra kéndava'a xí'in ndó. ¹⁹ Dá chi iin ña va'a kían noꝯ Ndios ña sa'á ña ñó'o ini ndo sa'a ná, sa'á ñoꝯ xí'o ndeé iní ndo tá kéndava'a sato'o ndo xí'in ndó, va'ará ni iin ña kini ko ní kée ndó. ²⁰ Chi, ¿ndí kían va'a ni'i ndo tá xí'o ndeé iní ndo tá kéndava'a sato'o ndo xí'in ndó sa'á ña kée ndó ña kini? Tído tá kéndava'a ra xí'in ndó sa'á ña kée ndó ña va'a, ta xí'o ndeé iní ndo, dá kían náta'an ini Ndios xiní na ndo'ó. ²¹ Chi ni kana Ndios ndo'ó ña kee ndó dión, dá chi ki'o dión ta'ani ni ndo'o naní ní mií Jesucristo sa'a yo, ta ki'o dión ni daná'a na noꝯ yo kaka yó íchi ni xika mií ná. ²² “Ni iin tó'on kuachi ko ní kée na, ta ni iin ña to'on ko ní kana yú'u ná ka'an na.” ²³ Ta va'ará ni ka'an ndava'a ra xí'in Jesús, tído ni iin tó'on to'on ndava'a ko ní nándio né'e na ka'an na xí'in rá. Ta va'ará ni dandó'o ra ní ná, tído ni iin ña'a ko ní ka'an na kee na xí'in rá. Di'a ni nachi'i na ndidaá ña ni ndo'o na noꝯ ndá'a Ndios, na kényiko ndaa sa'a ndidaá kúú ña'a. ²⁴ Ta ni nakuido mií Jesús ndidaá kúú kuachi yó tá ni sarkaa na ndika cruz, dá ná kandeé yó dánkoo yó kuachi kée yó, dá ná koni yo kee yó ña ndaa noꝯ Ndios. Dá chi sa'á ña ni tarkue'e Jesús, sa'á ñoꝯ ni nduva'a yó, ta ni nduvii yo. ²⁵ Dá chi ni sa kuu ndó táto'on léko ni sa xionoo ndava'a. Tído viti ni nándio kuéi ndó noꝯ na ndáka ñaa, ta ndaa va'a na ní ndo.

Di'a kánian kee na ni tandá'a

3 ¹ Ta ndo'ó, na ná'a, koo ini ndo kueídó'o ndó yí ndo, dá kían, tá ko xí'in ra kandísa ra to'on Ndios, kúú xinó ini ra kandísa raan sa'á ña kéndúsá'ano ndó, dá kían ko kánian ka'an ndo xí'in rá, dá kandísa

raan, ² chi koni ra ña va'a kée ndó, ta ió ñañó'ó ndó noo rá. ³ Ta o sa ndí'i téi ini ndo ña koo luu ñi ndo, á kían ña nacho'on lándo diní ndo, o á kían ña keluu ndó mií ndó xí'ín oro, o á kían ña kandixi ndó dá'on táyí ndaa. ⁴ Va'a kaan ndí'i ini ndo koo vii nío ndo noo Ndios, ña kían koo luu ndó xí'ín ña va'a ini ndo, xí'ín ña kueé ini ndo, chi ña yó'o kían o kúyatá ta'on, ta ña yó'o kían náta'an nda'o ini Ndios xiní na. ⁵ Chi di'a luu ni sa ndaa na ñá'a sa ndei sa na'á, sa kandeé iní na Ndios, ta ndino'o ini na ni sa seídó'o ná yíi ná. ⁶ Chi ki'o dión sa seídó'o naná sá'ano yó Sara yíi ná Abraham, ta sa ká'an na ña Abraham kúu sato'o na. Ta kúu ndó táto'on de'e di'í Sara sa'á ña kée ndó ña va'a, xí'ín sa'á ña ko xí'o ndó mií ndó ña yu'ú ndo.

⁷ Ta dión ni ndo'ó, ra taa, kaño'o ini ndo kandeí ndó xí'ín ñadi'í ndo. Ta ki'o ndó ñañó'ó noo ná sa'á ña kúu ná iin na vitá, xí'ín sa'á ña natiin nduú na xí'ín ndó ña maní ña kandeí chíchí ndó xí'ín Ndios. Tá kée ndó dión, dá kían ni iin tó'ón ña'a o kétéin noo ndo noo ká'an ndo xí'ín Ndios.

Va'a kaan ná ndo'o nío yo sa'á ña kée yó ña va'a o duú sa'á ña kée yó ña kini

⁸ Ta noo ndí'i, ká'in xí'ín ndó ña iin tó'ón ná kakuu ñaxintóni ndidaá ní ndó, ta ndo'o sa'a sátá'an ndó, ta koni ndo iin rá iin ndó táto'on ki'o ndó'o ndó xí'ín na ve'e mií ndó, ta ku'u ini sa'a sátá'an ndó, ta nda'í koo ini ndo. ⁹ O sa nándió kuéi ndó nandió né'e ndó ña kini noo na ni kee ña kini xí'ín ndó. Ta o sa ká'an ndava'a ndó xí'ín na ká'an ndava'a xí'ín ndó. Di'a kaka ndo ña maní noo Ndios sa'a ná, dá chi ná'á ndó ña ni kana Ndios ndo'ó ña kían natiin ndó ña maní noo ná. ¹⁰ Dá chi di'a kaá tuti ií Ndios:

Ndi ndaa ndo'ó katoó kandeí va'a, ta kandeí dii ñayuu yó'o, dá kían kánian kandaa ndo yáa ndo, dá ná o yá'a ña ka'an ndava'an, ta ni yú'u ndo ná o sa ká'an ni iin ña to'ón.

¹¹ Kexoo ndó noo ña kini, ta kee ndó ña va'a.

Ta nandukú ndó ña kandeí va'a ndó xí'ín ñayuu, ta ndiko toon ndoan.

¹² Dá chi ndé'é va'a sato'o yo Ndios na kée ña ndaa, ta ió nduu na seídó'o na ña xíka na noo ná.

Tído ko náta'an ini na xiní na na kée ña kini.

¹³ ¿Ndá yoo kendava'a xí'ín ndó tá ná ndiko ndo ña va'a? ¹⁴ Tído ndiká'an ndi kúu ví ndó tá kéndava'a na xí'ín ndó sa'á ña kée ndó ña va'a. Sa'á ñoó o sa yu'ú ndo tá kée na dión xí'ín ndó, ta o sa kútúu ini ndo. ¹⁵ Di'a naki'o ndó ñañó'ó noo Ndios, na kúu sato'o yo, xí'ín ndino'o ini nío ndo. Ta daá kuití kandeí nduu ndo ki'o va'a ndó kuendá xí'an kueé ió ini ndo, xí'ín ñañó'ó noo ndi ndaa mií ñayuu ndato'ón ndo'ó sa'á tandeé iní kómí ndó. ¹⁶ Ta koo ini ndo kakomí ndó iin ñaxintóni vii, dá kían tá ká'an u'u na sa'a ndo'ó, dá kían ná xíka'an noo mií ná sa'á ña

chínani kini na ña va'a kée ndó sa'á ña kúú ndó kuendá Cristo. ¹⁷ Chi va'a cháá ka ná ndo'o nío yo sa'á ña kée yó ña va'a, tá k'i'o dión kóni mií Ndios, ta o duú sa'á ña kée yó ña kini. ¹⁸ Dá chi ni ndo'o ta'ani nío Cristo tá ni xi'i na iin tó'on ndée sa'á kuachi yó. Iin na ndaa kúú ná, tído ni xi'i na sa'a yóó, na kómí kuachi, dá kuu kandaka na yó ko'on na noo Ndios. Chi miían ndaa ni xi'i yikí koño na, tído ió takí va Espiritu ná.

¹⁹ Ta ni sa'an Espiritu ná ni daná'a na noo espiritu ndadí ni'ini noo iin naá, ²⁰ ta ña yó'o ni sa kuu ña ko ní xiin kueídó'o Ndios tá sa na'á, va'ará kueé ni sa ndati Ndios xían nani ni kava'a Noé arca. Ta cháá nda'o ñayuu ni kaki noó takuií kua'a ñoó. Sava'a ona ni sa kuu na. ²¹ Ta viti sódo ndúta yo xí'in takuií sa'á ña kándéé iní yo Jesús, dá kaki yó, táto'on k'i'o ni dakáki Ndios Noé noó takuií ñoó. Ko kée yó dión sa'á ña kóni yo nakata yó ñíi yo, di'a kée yoan dá chi ndino'o ini yo kóni yo koo vii ñaxintóni yo, chi ni kaki yó sa'á ña ni nataki Jesús. ²² Ta ni nana na kua'an nó'o ná induú. Ta viti ió na xoo kuá'a Ndios. Ta tixi ndá'a míi ná ñó'o ndidaá ángel, xí'in ta né'e choon, xí'in ta dándáki.

Ná dá'a ka ni kee yó ña kini sa kee yó tá ko ñá'a ni nduu yó kuendá Jesús

4 ¹ Táto'on k'i'o ni ndo'o nío yikí koño Jesús, k'i'o dión kánian kandeini nduu ndo' ndo'o ta'ani nío ndo, dá chi na ni ndo'o nío yikí koño, noón kúú na ni taó xoo ndó noo kuachi, ² dá kían nani ndéi tóo ndó ndíxi ndó yikí koño ndo, ná dá'a ka ni kandeini ndó kee ndó ña kini kátoó dao ka ñayuu. Di'a kandeini ndó kee ndó ña kóni Ndios. ³ Cháá dión ka ni kee ndó táto'on k'i'o kée ñayuu ko ná'a Ndios, chi sa katoó ndo kee ndó kuachi xí'in ndi ndaa mií vá ñayuu, ta sa katoó ndo kee ndó kuachi ka'an noo xí'in ñíi ndo, ta sa kuu ndó na xi'í, ta sa kee ndó víko ka'an noo, ta sa xi'i lóko ndo, ta sa ndaño'o ndó yoko, ña ko náta'an ini Ndios xiní na. ⁴ Ta naá ini na sa ne'e tá'an va'a xí'in ndó sa'á ña ko kée ka ndo ndidaá ña kini yó'o, ta ká'an ndava'a na sa'a ndo viti. ⁵ Tído iin kuu kánian nak'i'o na kuendá noo Ndios sa'á ña kini kée na, dá chi sa io nduu va Ndios ña kían keyíko na sa'á na takí, xí'in sa'á na ni xi'i. ⁶ Sa'á ñoó ni seídó'o ta'ani na ni xi'i to'on va'a sa'a Jesús, dá kían, va'ará ni xi'i na táto'on kánian ndo'o ndidaá ñayuu, tído takí va nío ná kée Ndios.

Ná kee yó choon ni xi'o Ndios ña kat'i'a yó kee yó

⁷ Sa kua'an kuyati va ña naá ndidaá ña'a. Sa'á ñoó ndito koo ini ndo, ta kaño'o ini ndo ka'an ndo xí'in Ndios. ⁸ Ta ña ndáya'i cháá ka kánian kee ndó kían ndino'o ini ndo ku'u ini ndo sa'á ñayuu xi'in ndó, chi tá kú'u ndisa ini yo sa'a dao ka ñayuu, dá kían k'i'o ká'ano ini yo sa'a ná, va'ará kuá'a nda'o kuachi kée na xí'a. ⁹ Ta koo ini ndo natiin va'a ndó ñani ndo tá kosaa na ve'e ndó, ta o sa ká'an kuachi ndo tá kée ndó dión. ¹⁰ Ta noo iin rá iin ndó ni xi'o Ndios ña kat'i'a ndó kee ndó iin choon,

sa'á ñoó dákuá'ano ndó dao ka ñayuu xí'án. Chi ni ni'i ndo choon ña kechóon va'a ndó noo ndidaá ña maní ni xi'o Ndios noo ndo. ¹¹ Sa'á ñoó tá dána'a iin ndó, dá kían dána'a ndo táto'on ki'o ká'an to'on Ndios. Tá xínkuáchí ndó noo ñani ndo, dá kían kechóon ndó xí'ín ndée xí'o mií Ndios noo ndo. Ta sa'á ña kée ndó dión, sa'á ñoó natiin Ndios ndidaá tá'an ñañó'ó sa'a Jesucristo, na daá kuití kómí ndidaá tá'an ñañó'ó, ta daá dándáki na ndidaá ña'a. Dión ná koo.

Ná kadii iníó tá ndó'o níó yo sa'a Jesús

¹² Ñani maní, o sa naá ini ndo sa'á tandó'ó kini ndó'o ndó, tá'an ña xírndodó ndo'ó. O sa ká'an ndó ña ko kánian ndo'o ndó dión. ¹³ Di'a kadii ini ndo sa'á ña ndó'o ndó táto'on ni ndo'o Cristo. Chi tá ná kasandaá kuu nandió koo na xí'ín ndidaá ña ndato kómí ná, dá kían nakutí ndó xí'an kadii iní ndo. ¹⁴ Tá ká'an ndava'a ñayuu sa'a ndo sa'á ña kúú ndó kuendá Cristo, dá kían ndiká'an ndi kúu ví ndó, chi ió Espíritu ndato Ndios xí'ín ndó. Mií'an ndaa ká'an ndava'a ñayuu sa'a Espíritu, tído sa'a ndo'ó natiin na ñañó'ó. ¹⁵ Chi iin ña ka'an noo nda'o kían tá ndó'o níó ndo sa'á ña sa'ání ndo ndi, o sa'á ña kí'in kuí'íná ndó, o sa'á ña kúú ndó na kini, o sa'á ña chírneé chítuu kúu ndó noo tandó'ó dao ka na. ¹⁶ Tído tá ndó'o níó ndo sa'á ña kúú ndó kuendá Jesús, dá kían ná dá'a ni xíka'an noo ndo. Di'a keká'ano ndó Ndios sa'á ña ndó'o ndó dión.

¹⁷ Dá chi sa ni kasandaá va kuu ña keyíko Ndios sa'á ñayuu na. Ta tá dinñó'ó keyíko na sa'a yóó, dá kían, ¿xíni ndí kían ndo'o na ko xíin kueídó'o to'on va'a sa'a Jesús tá ná keyíko sa'a ná? ¹⁸ Dá chi di'a kaá tuti i Ndios:

Ndi ki'o ví kánian ndo'o níó na kée ña kóni Ndios, dá káki na.

Sa'á ñoó, ¿xíni ndí kían ndo'o na ko xíin kandísa Ndios, xí'ín na kée kuachi?

¹⁹ Sa'á ñoó tá kóni Ndios ña kían ndo'o níó ndo, dá kían naki'o ndó mií ndó noo ndá'a ná, chi iin na ndaa kúu na ni kava'a ñayuu yó'o. Ta daá koo ini ndo kee ndó ña va'a.

Di'a kánian kee na sá'ano né'e choon ve'e ño'o

5 ¹ Ta kóni kakai iin ña maní noó na sá'ano né'e choon noo ndo, chi na sá'ano ta'ani kúu yu'u. Ta ni xini xí'ín noóí táto'on ni ndo'o níó Cristo, ta koo ta'ani yu'u xí'ín ndó noo ndato káa na'a noo Ndios chí noo. ² Koo ini ndo kandaka ndó ñayuu Ndios ño'o tixi ndá'a ndo, ta kanda va'a ndó na, tído o sa kée ndóan sa'á ña kánian kee ndóan, di'a kee ndóan xí'ín ndino'o ini ndo. Ta o sa kée ndóan sa'á ña kátóó ndo di'ón. Di'a kee ndóan sa'á ña ndino'o ini ndo kóni ndo chindeé ndó na. ³ Ta o sa kée ndó míí ndó iin sato'o noó na ndáka ndó. Va'a kaan kee ndó ña va'a noo ná, dá ná kati'a ta'ani na kee na dión. ⁴ Dá tá ná

kasandaá kuu nandió koo tuku Jesús, na kúú míí sato'o noo ndidaá na ndáka léko, dá natiin ndó iin corona, ña kúú ñañó'ó, ña kían ni iin kuu o naá.

⁵ Ta dión ni ndo'ó, takuáchí tákí, koo ini ndo kueídó'o ndó na sá'ano né'e choon ve'e ño'o ndo. Ta ndidaá ní ndó kánian kueídó'o tá'an ndó xí'an nda'í ió ini ndo, chi:

Ko náta'an ini Ndios xiní na ñayuu ió táyí ini,
ta di'a xí'o na ña maní noó ñayuu ió nda'í ini.

⁶ Sa'á ñoó nda'í koo ini ndo kaño'o ndó tixi ndá'a Ndios, dá kían ná kí'o na ñañó'ó noo ndo tá ná kasandaá kuu ni kaxi mií ná. ⁷ Ta chikodó ndó ndidaá tandí'i ini ndó'o ndó noo ndá'a Ndios, dá chi noón kúú na ndí'i ini sa'a ndo.

Kandaa ndo mií ndó noó ña u'u

⁸ Ta kaon koo ndó, ta kaño'o ini ndo kandeí ndó, chi ña u'u kían xiní u'u ndo'ó. Táto'on kí'o kée iin ndika'a tondó, kí'o dión kéean xionooan ndúkúán ndá yoo kendava'a xí'an. ⁹ O sa kónó ndó ña dátúuán ndo'ó. Kuita toon ndó xí'in ña kándéé iní ndo Jesús, dá kandeé ndó xí'an. Chi sa ná'á vá ndó ña kí'o dión ta'ani ndó'o ní'o dao ka na kúú kuendá Jesús ndéi iin ní kúú ñayuu. ¹⁰ Tído Ndios, na xí'o ndidaá ña maní noo yo, noón kúú na ni kana yó ña kandeí chíchí yó noo ndato náye'e sa'á ña ni kee Jesucristo. Sa'á ñoó, tá ni ndí'i ni ndo'o ní'o ndo cháá, dá ndendaa na ndo'ó, ta nachikata ndaa na ndo'ó, ta kí'o na ndée noo ndo, ta ndendakí ná ndo'ó xí'in ña kándísa ndó. ¹¹ Ta daá kuití ná natiin na ñañó'ó, ta daá ná dándáki na ndidaá ña'a. Dión ná koo.

Yó'o ká'an Pedro ndisá'an noo ndi'i

¹² Ta xí'in ñani yo Silvano, tá'an ra kúú iin taa ná'í iin ndaa xí'in Jesús, ni taai cháá to'on noo tuti yó'o kosaaan, dá ka'an ni'inii noo ndo, ta xí'o ndaaí kuendá ña kí'o dión kémani Ndios ndo'ó, ta sa ñó'o ndó tixi ña maní yó'o viti. ¹³ Ta na kúú kuendá Jesús ndéi chí Babilonia, tá'an na ni kaxi mií Ndios táto'on kí'o ni kaxi na ndo'ó, xí'in ñani yo Marcos, na kúú táto'on de'e mií yu'u, tánda'á ndisá'an kosaa noo ndo. ¹⁴ Ta ña ka'an tá'an ndó ndisá'an ná kakuuan ña chitó tá'an ndó noo ndo sa'á ña kú'u ini sa'a sátá'an ndó. Ta daá kuití ná koo va'a ini ndo'ó, na kúú kuendá Jesucristo. Dión ná koo.